

Obraćanje
rektora Univerziteta u Sarajevu prof. dr. Tarika Zaimovića

Promocija diplomanata i diplomantica, magistrantica i magistranata Univerziteta u Sarajevu
1. februar 2025.

Dobro došli na promociju diplomanata i diplomantica, magistrantica i magistranata Univerziteta u Sarajevu za akademsku 2023/2024. godinu.

Danas, Univerzitet u Sarajevu promovira 3633 studenta i studentice I i II ciklusa, integriranog studija, stručnog i specijalističkog studija te predbolonjskog studija.

U ovoj generaciji, 195 studentica i studenata Univerziteta u Sarajevu tokom studija ostvarili su rezultate kojima su zaslužili posebna priznanja Univerziteta – zlatne i srebrene značke, te povelje Univerziteta.

Ovo je poseban dan za sve nas, a najviše za naše diplomante, diplomantice, magistrante i magistrantice. Danas slavimo vaša akademska postignuća i put koji ste prošli kako biste stigli do ovog trenutka. Taj put nije bio jednostavan. Bio je to put pun izazova, odricanja, ali i ličnog rasta i razvoja. I uspjeli ste.

Ustrajali ste u svojim ciljevima, prevazišli ste različite izazove i održali motivaciju kako biste danas simbolično, ali i sadržajno postali akademski građani spremni da svojim znanjem i inovativnošću kroz vaš naučni, istraživački i stručni rad doprinesete napretku naše zemlje i društvene zajednice.

Budite ponosni na to da ste diplomanti i magistranti Univerziteta u Sarajevu!

Na ovom putu niste bili sami. Iza vas je bila vaša porodica i vaši prijatelji, čija je ljubav i podrška popločala put stizanja do cilja. Oni su sa vama dijelili svaku teškoću, svaki uspjeh, noći provedene u učenju, trenutke sumnje, male i velike pobjede.

Drage porodice i prijatelji naših studenata, bez vaše nesebične podrške, danas ne bismo svjedočili ovim ponosnim licima.

Hvala vam što ste bili oslonac i snaga u trenucima kada je bilo najpotrebnije.

Uz vas su bili i vaši profesori. Ponekada strogi, ponekada blagi, ali uvijek na vašoj strani. Zahvaljujem se svim našim kolegama i kolegicama na Univerzitetu u Sarajevu koji su nesebično dijelili svoja znanja i bili oslonac svojim studentima i studenticama.

Vaš trud i zalaganje neizmjereno su važni i zaslužuju najdublje poštovanje.

Živimo u vremenu punom izazova, a globalni problemi kreiraju nadasve kompleksno i neizvjesno okruženje za život i rad. A vi, dragi diplomanti i magistranti, sa današnjim danom ulazite u svijet u kojem je potrebna mudrost, hrabrost i odlučnost za konstruktivno djelovanje i rješavanje zajedničkih izazova.

Vaša uloga u našem društvu postaje ključna, a vi – mladi ljudi puni energije i znanja, nositelji ste promjena. Vi ste ti na koje se naše društvo oslanja. Vaša spremnost da preuzmete odgovornost za opšte dobro i napredak biti će temelji na kojima će se graditi naša domovina. To neće biti lagan put. Biće mnogo izazova, ali je to put kojim je vrijedno ići. Na tom putu mislite kritički i donosite odluke zasnovane na nauci.

Usudite se izaći iz zona ugodnosti, preuzmite inicijativu – a u najtežim trenucima zadržite vjeru u Dobro. Univerzitet u Sarajevu će uvijek biti uz vas, kao oslonac u daljnjem profesionalnom razvoju i naučnom usavršavanju. To je mjesto gdje ste sticali znanja, razvijali se kao osobe i građani svijeta. Pozivam vas da

nosite ime svog univerziteta s ponosom, da ga poštujete – a kroz život i rad promovirate vrijednosti znanja i obrazovanja.

Dragi diplomanti i magistranti, svi mi smo danas ponosni na vas.

Pred vama su sada novi izazovi, ali i nove prilike. Bez obzira na put koji odaberete, budite predani u svojim odlukama, vjerni svojim ciljevima i odgovorni prema društvu.

Budite ambasadori promjena, lideri u svojim poljima – ali iznad svega, dobri ljudi. Naše društvo treba vašu energiju, vašu viziju i vaše srce. Gradite inkluzivno društvo na dobrobit svih, a nikako ne društvo u kojem vladaju elite.

Univerzitet u Sarajevu je bio i ostaje vaša akademska kuća.

Na kraju, još jednom vam čestitam na ovom izuzetnom postignuću i želim vam uspjeh u životu i radu – a moja poruka Vama danas je budite hrabri.

Budite hrabri u borbi za sve nas.

Budite glas beskrajno potrebne promjene.

Vaš glas je mnogo jači i mnogo više rezonira nego što mislite.

I ni po koju cijenu nemojte oštricu svoje kritičke misli zamijeniti propustima generacija prije vas.

Budite kreatori promjene, a ne samo akteri nespretno postavljene predstave nemogućih kompromisa.

Mi smo ti koji moramo prihvatiti vaš narativ, a ne vi naše slabosti.

Budite sve što mi nismo umjeli biti.

Budite sve za što mi hrabrosti imali nismo.

Hvala Vam.